

AURKIBIDEA

Ekainaren 4ean, HIRUTASUN GUZTIZ SANTUA	4
Ekainaren 11n, KRISTOREN GORPUTZ-ODOL SANTUAK.....	12
Ekainaren 18an, URTEAN ZEHARREKO XI. IGANDEA	19
Ekainaren 25ean, URTEAN ZEHARREKO XII. IGANDEA	25

Pentekoste ondorengo Igandea

Ekainaren 4an

HIRUTASUN GUZTIZ SANTUA

Kontenplalarien aldeko Jardunaldia

Agurra

Jesu Kristo gure Jaunaren grazia eta Jainko Aitaren maitasuna eta Espiritu Santuaren batasuna izan bedi zuekin.

Sarrerako oharpena

Hirutasuna da Kristauon Jainkoa. Horixe aitortzen dugu Kredoan, Aita, Semea eta Espiritu Santua sinesten ditugula aitortuz. Horixe adierazten dugu egunean zehar, otoitzean nahiz ospakizunean kristauon seinale den gurutzea gudan egitean. Kreatzaile, salbatzaile eta bizi-emaile dugun Jainko horrek markatzen gaitu.

Otoitzari emanak bizi direnak, lekaide eta lekaime kontenplalariak gogoratuko ditugu gaur. Eliza osoaren alde, mundu osoaren alde otoitzean bizi dira beraiek. Gaur guk egingo dugu otoitz bereziki beraien alde, Jainkoari eskerrak emanaz, Eukaristia santu honetan.

Damu-otoitza

Eska dezagun apaltasunez Jainkoaren barkamena eta errukia:

—Jesus Jauna, zeruko Aita ezagutzera **e**man diguzuna: erruki, Jauna.

—Jesus Jauna, Espiritu Santua gure bihotz barrenean **ja**rrri diguzuna: Kristo, erruki.

—Jesus Jauna, Aitarekin eta Espiritu Santuarekin elkar maitasunean bizi zarena: Erruki, Jauna.

Erruki dakigula Jainko guztiz ahaltsua, eta, gure bekatuak barkaturik, eraman gaitzala betiko bizira.

Otoitza

Jainko Aita, egiaren Hitza den zeure Semea
 eta Espiritu santutzailea bidali dituzu mundura
 gizon-emakumeei zeure misterio miragarria agertzeko;
 egizu, egiazko sinesmena aitortuz,
 ezagut dezagula betiereko Hirutasunaren aintza
 eta gurtu dezagula Batasun ahalguztiduna.
 Zure Seme Jesu Kristo gure Jaunaren bitartez,
 Zurekin eta Espiritu Santuarekin batean
 Jainko eta errege bizi baita gizaldi eta gizaldietan.

Hitzaren liturgiari oharpena

Askok dio Jainkorik ez dela edo isilik dagoela. Baina bihotzez garbi denarentzat, hurkoa maite duenarentzat eta gauza harrigarrien aurrean liluratzen denarentzat Jainkoa ez dago isilik. Holakoentzat Jainkoa beti da berritzailea.

Lehenengo irakurgaia (*Jr 34, 4b-6. 8-9*)

Irteera liburutik

Egun haietan, goizean goiz, bi harlauzak harturik, Sinai mendira igo zen Moises, Jaunak agindu bezala. Orduan, Jainko Jauna laino batean jaitsi eta Moisesekin gelditu zen, eta honek Jaunaren izenari dei egin zion. Moisesen aurretik igaro zen Jauna, hau hots eginez:


«Jauna, Jauna, Jainko bihozbera eta errukitsua, haserregaitza eta onginahiz eta leialtasunez bete!»

Berehala, lurreraino ahuspeztu zen Moises eta esan zuen: «Jauna, gogoko banauzu, zatoz, arren, gurekin! Herri hau burugogorra da, bai; baina barkatu Zuk gure gaiztakeriak eta bekatuak, eta har gaitzazu zeure ondaretzat».

Erantzun-salmoa (Sal 8, 4-5. 6-7. 8-9)



Bedeinkatu-a Zu, Jau-na, gure arbaso-en Jain-ko-a;



R/. Aintza ta gorespeZuri gizal di - e-tan.

∞. Bedeinkata Zu, Jauna, gure arbasoen Jainkoa:

℞. Aintza eta gorespen Zuri gizaldietan!

∞. Bedeinkatua zure izen santua eta ospetsua: ℞.

∞. Bedeinkatua Zu zeure tenplu santu eta ospetsuan: ℞.

∞. Bedeinkatua Zu, errege-tronuan eseria zaudena: ℞.

∞. Bedeinkatua Zu, kerubinen gainean eseririk,
leizeak arakatzen dituzuna: ℞.

∞. Bedeinkatua Zu zeru-sabaian: ℞.

Bigarren irakurgaia (2 Ko 13, 11-13)

San Paulo Apostoluak Korintoarrei egindako bigarren gutunetik

Senideok: Poztu zaitetze, saiatu on-onak izaten eta eman elkarri adore; izan iritzi bereko eta bizi bakean. Eta maitasunaren eta bakearen Jainkoa zuekin izango da.

Agurtu ezazue elkar besarkada santuaz. Fededun guztiek agurtzen zaituztete. Jesu Kristo gure Jaunaren grazia, Jainkoaren maitasuna eta Espiritu Santuaren batasuna izan bedi zuekin guztiokin.

Aleluia (Ik. Ap 1, 8)

A - le - lu - ia, a - le - lu - ia, a - le - lu - ia.

∇. Aintza Aitari, eta Semeari,
eta Espiritu Santuari,
baden, eta bazen, eta etortzekoa den Jainkoari! ∇.

Ebanjelioa (Jn 16, 12-15)

Homiliarako argibideak

Bakarra da

Erlijio monoteistak, Jainko askodun erlijioak, jainkorik gabeko bizimoldeak... era askotako jarrera eta jokaerak daude han eta hemen. Jesus gabeko Jainkozaleak, Jainkorik gabeko Jesuszaleak, Jainko gabeko eta Jesus gabeko ateoak... Eta horien bereizketan sartuko bagina, betikoa gertatuko litzaiguke, eztabaida azken gabea. Azken gabea eta alferrikakoa. Hirutasunaren festaburua ospatzen dugu fededunok igande honetan. Hemen ere bilatu izan da eztabaidarako aitzakia: zer esan nahi du Jainko bat izatea hiru pertsonatan?, nola hiru pertsona Jainko bakarra izanik?

Zoritxarrez, azken batean eta denbora luzez, alferrikako zenbaki-ariketan ibili izan gara gure elizetan ere. Zenbaitek, gainera, horretan jarri du bere borondate osoa eta zenbaki-ariketaren arabera neurtu izan du jendearen fedea. Eta ez da hori inondik inora!

Auzia badakizu zer den? Honako hauxe: nik «ikusi» ote dut, «bizi» ote dut, «sentitu» ote dut, «sumatu» ote dut Jainko bakarraren esperientzia? Edo, galdera beste aldetik eginez, Jainkoaren esperientzia era hain sakonean bizi izan ote dut, «bakarra» dela ikusteko? Jainkoa bizitzaren «florero» bezala hartzen denean, asko eta era askotakoak izan daitezke J(j)ainkoak. Baina, Jainkoa ez da bizitza apaintzeko «florero».

Esaten da, Jainko guztiek balio bera dutela eta errespetatu egin behar dela guztien esperientzia. Errespetatu, noski! Horixe behar genuen, ez errespetatzea! Baina, Jainko guztiek teorian balio bera badute ere, galdera beste hau da: niri nor egin zait, zein Jainko egin zait, bihotzaren jabe? Betiko adibidea jarriko dizut beste behin: emakume guztiek duintasun bera dute eta teorian balio ere berdin balio dute; baina, bat egiten zaizunean bihotzaren jabe, emakume batez enamoratzen zarenean, emakume bakarra daukazu zeuregan! Eta, alderantziz, gizonaren kasuan ere berdin da.

Jainkoari gagozkiola, beraz, galdera hau da: Jesusen Jainkoa egin al zait bihotzaren jabe? Mendekostez ospatzen genuen Espirituak barrutik eman didan argiak Jesusen Jainkoa «esperientziaz ezagutzera» ekarri al nau? Hori gertatu baldin bazaizu, Jesusen Jainkoa «ezagutu» duzula, argi eta garbi ikusten duzu Jainkoa bakarra dela. Errespetatu denak egingo dituzu, baina zuretzat ez da besterik, Jesusen Jainkoa baino. Kristau-sinesmenaren esperientzia egin duenak «badaki» ez dela besterik.

«Esperientziaz ezagutu» esan dut, eta hala da. Kontua ez da Jainkoen filosofian aditua izatea, baizik Jainkoaren esperientzia egitea. Eta, atrebentzia eta guzti, esango nuke, gure eliztarren artean Jainkoaren esperientzia gutxi landu dugula. Eta gero nahasketak etortzen dira: Jainkoa Elizaren jokaeraren galbahean pasatzen da; eta nola Eliza gaizki dabilen, beste Jainko batzuk erakargarriago egiten zaizkigu. Elizak badu, noski, bere erantzukizuna, Jainkoaren irudi garbia ematen ez duelako; baina erantzukizun handiagoa duela esango nuke, Jainkoaren esperientzia lantzen ez duelako.

Nola landu daiteke Jainkoaren esperientzia, Jainkoa ez ikusi, ez ezagutu, ez entzun, ez neurtu ezin dugularik? Bide bakarra daukagu: Jesusen bidez hurbiltzea Jainkoarengana. Jesus da Jainkoaren argazkia, Jesus da Jainkoaren definizioa. Jesus da Jainkoaren neurria, Jesus da Jainkoaren hitza. Jesusi ere begira diezaiokegu, ordea, giza begi hutsez! Espirituak ematen du barruko begia Jesusengan Jainkoa ikusi eta ezagutzeko. Espirituaren argitan Jesus irakurriz Jainkoa ezagutzen da.

Eta, dudarik gabe, Jesusen Jainkoa «ezagutzen» duzunean, haren egintza askatzailea «ikusten» duzunean, haren dohaina «gozatzen» duzunean, haren presentzia askatzailea «sumatzen» duzunean, badakizu ez dela beste Jainkorik. Jesusen Jainko horrek bihotza hartzen dizu eta bihotzeko «bakar» egiten zaizu. Adituek eta filosofoek, teologoek eta moralistek, erlijio-zientzialariek, jarrai dezatela beren eztabaidetan. Zuri bihotza Jesusen Jainkoak harrapatu dizu, eta «bakarra» da!

Jainkoaren herriaren otoitza

Senideok: egiogun otoitz Aita maitagarri dugun Jainkoari, Jesu Kristogan bere maitasuna agertu digunari eta Espirituaz eragiten digunari.

- Jainko Aita Sortzaileak mundua bere betera eraman dezan, eta hitz emandako zero-lur berriak sorraraz ditzan, gizadi osoak egiazko zoriona aurkitu eta Bere aurpegi aintzatsua goza ahal izateko. Eska diezaiogun Jaunari.
- Gizon eginik Elizarekin bat egin zen Jainkoaren Seme Bakarrak, eman diezaiola Elizari berari emazte bezala erantzuteko Bere maitasun betea. Eska diezaiogun Jaunari.
- Mundua bere dohainez aberasten duen Jaunaren Espiritua behartsuentzat aita, nahigabetuentzat atsedeen, gaixoentzat osasun eta erorientzat indar gerta dadin. Eska diezaiogun Jaunari.
- Hirutan bakarra den Jainkoaren misterioa ezagutzen dugunok, Haren berri eman diezaiogun ezagutzen ez dutenei, pozez ezagutu dezaten Aita, Seme eta Espiritu agertu zaigun Jainkoa. Eska diezaiogun Jaunari.

Leiala eta errukiorra zaren Aita, Zure Seme bakarra bidali zenigun mundura, eta Zure Espiritua guretzat bizi-oinarri, batasun-eragile eta maitasun-iturri izatea nahi izan zenuen; entzun gure otoitzak, sendotu gure fedea eta eragin guran bakea eta esperantza, Elizaren batasunean Zure izen santu eta aintzagarria gores dezagun beti. Jesu Kristo gure Jaunaren bitartez.

Oparigaien gainekoa

Jainko gure Jauna,
zure izen santuari dei egiten diogu:
egin itzazu santu, zeure ahalmenaz,
aurkezten dizkizugun dohain hauek,
eta horien bidez bihur gaitzazu guztiok Zeuretzat
betiko opari atsegingarri.
Jesu Kristo gure Jaunaren bitartez.

Jaunartze-ondorengo otoitza

Jainko gure Jauna, betiereko Hirutasun Santua eta haren Batasun hautsezina aitortu dugu; egizu, hartu dugun sakramentu honetan aurki dezagula gorputz-arimen osasuna. Jesu Kristo gure Jaunaren bitartez.

Hirutasun Santuaren ondorengo Igandea

Ekainaren 11n

KRISTOREN GORPUTZ-ODOL SANTUAK

Caritasen Jardunaldi berezia

Agurra

Jesu Kristoren grazia eta bakea izan bitez zuekin

Sarrerako oharpena

Ongietorri! Kristoren gorputz-odolen jaiia dugu gaur. Eukaristia ospakizunari berari eta, honek gure bizitzan duen luzapenari begira jartzen gaitu gaurko jaiak. Gure lanetan, gure izate osoan, aurkitzen ditugun pertsonetan presente egiten da bizi-bizi Eukaristiaren dohaina. Gure bizitzaren erdigune dira ogi-ardo hauek. Gure ogi eta ardoari (gure bizitzako gauza apalei) izen berria, izate berria ematen baitie. Hauxe da ba gaur ospatzen duguna, Caritassek gogorarazten dizkigun behartsuak ahaztu gabe: beraiek gertatzen baitira Eukaristia, esker on.

Damu-otoitza

Senideok: aitor ditzagun gure bekatuak misterio santuak ospatzeko gai izan gaitzen

—Jesus Jauna, zerutik jaitsi zen **O**gia zarena: erruki, Jauna.

—Jesus Jauna, betiko bizia ematen duen **O**gia zarena: Kristo, erruki.

—Jesus Jauna, zeure biziaz janar**it**zen gaituzuna: Erruki, Jauna.

Erruki dakigula Jainko guztiz ahaltsua, eta, gure bekatuak barkaturik, eraman gaitzala betiko bizira.

Otoitza

Oi Jainko,
 sakramentu harrigarri honetan
 zeure heriotzaren oroigarria utzi diguzu;
 egizu, gorets dezagula fede biziz
 zure Gorputz Odolen misterioa,
 geuregan zure erospenaren ondorenak suma ditzagun beti.
 Aitarekin eta Espiritu Santuarekin batean
 Jainko eta errege bizi baitzara gizaldi eta gizaldietan.

Hitzaren liturgiari oharpena

Israel herria basamortuan zaindu zuen Jainkoa bera da, Israel berria den Eliza ere batasunean zaintzen duena. Ogi beretik janez bat egiten dugu Aitarekin: betiko bizia ematen digun Jainkoarekin.

Lehenengo irakurgaia (*Dt 2-3. 14b-16a*)

Deuteronomioa liburutik

Moises honela mintzatu zitzaion Israel herriari: «Gogoratu Jaunak zure Jainkoak basamortuan berrogei urte hauetan eginarazi dizun bidea: atsekabetu egin zaitu eta probatu, zure barne-asmoak ezagutzeko eta zuk beraren aginduak beteko zenituen ala ez jakiteko.

Behar gorrian jarri zintuen, gosea pasarazi eta mana eman zizun jaten, ez zuk eta ez zure gurasoek ezagutzen ez zenuten janaria, zuri jakinarazteko gizakia ez dela ogiz bakarrik bizi, baizik eta Jaunaren ahotik ateratzen den hitz guztitik bizi dela.

Ez ahaztu Jauna zeure Jainkoa. Berak atera zaitu Egiptotik, esklabotza--lurraldetik; berak eraman zaitu suge pozoitsuz eta eskorpioiz betetako basamortu handi eta ikaragarrian barrena, urik gabeko eremu elkor horretan barrena; berak atera du sukarritik ura eta edaten eman dizu; berak eman dizu jaten basamortuan zure gurasoek ezagutu ez zuten mana».

Erantzun-salmoa (Sal 147, 12-13. 14-15. 19-20)



O Je - ru - sa - len, zu -re Jau - na - ri kan - tuz e - kin.



- ∞. Jerusalem, ospa ezazu **zu** Jauna,
Sion, goretsi zeure **Jain**koa,
zure ateen sarrailak indartu **baititu**
eta seme-alabak zure baitan **bedain**katu. ∞.
- ∞. Zure mugetan bakea **ezarri** du,
garirik onenaz **ase** zaitu.
Bidaltzen du lurrera bere **mezua**,
eta haren hitza bizkor eta **arin** doa. ∞.
- ∞. Bere hitza iragarri dio Jakob en **herriari**,
bere erabakiak eta aginduak **Israeli**.
Beste herriei ez die horrelako **rik** egin,
bere erabakirik ez die jakin **arazi**. ∞.

Bigarren irakurgaia (1 Ko 10, 16-17)

San Paulo Apostoluak Korintoarrei egindako lehenengo gutunetik

Senideok: Jainkoa bedeinkatuz hartzen dugun esker onezko kalizak ez al gaitu Kristorekin bat egiten haren odolean? Eta zatitzen dugun ogiak ez al gaitu Kristorekin bat egiten haren gorputzean? Ogia bat denez, guztiok gorputz bat gara, ogi bakarretik hartzen baitugu denok.

Aleluia (Jn 6, 51)



✠. Ni naiz zerutik jaitsia den ogi bizia, **di**o Jaunak; ogi honetatik jaten duena betiko **bi**ziko da. ✠.

Ebanjelioa (Jn 6, 51-58)

Homiliarako argibideak

Ogi beretik jatea

Denetik ugari daukagu, ase arte. Badakigu, ordea, badirela eskolako jangelan bakarrik jaten duten haurrak. Udaran bere elikadura mugatua ikusiko dutenak. Sarritan ikusten ditugu telebistan ere, gose handia nozitzen duten munduko lurraldeetako irudiak. Aztoratu eta kezkatzen gaituzte, baina ez dugu aldatzen gure bizitza erritmoa.

Israel herria ikusten dugu, arazorik gabe bizi denean, ia ahaztu egiten duela nondik datorren eta nora doan. Jainkoak oroimena berreskuratzeko esaten dio: gogora dezala basamoratuan ibili zeneko aldia, Jainkoak nola zaindu zuen eta jateko eman zion (*Dt 8,2-3.14b-16*). Ez du ahaztu behar, gizakia ez dela bizi ogiz bakarrik, Jainkoaren ahotik ateratzen den hitz guztitik baizik. Gorputzeko

goseaz gain, badira ase beharreko beste baldintzak ere. Jainkoarein bat egin behar duen gizakiak, Jainkoaren Hitza eta Kristoren Gorputza behar ditu biderako janari.

Eguneroko elikagaiek ez digute amaigabeko bizitza ziurtatzen. Espirituaren janariak bakarrik eman diezaguke betiko bizia. Jesusek janari hori hitz eman zigun eta janari hori Bera zela aitortu zuen. Zapaldua, zigortua eta heriotzaraino zemaitua izan zenak, bere bizia eman zuen askatasunez, besteek bizia izan dezaten. Eta eskaintza hori, Azken Afarian eratu zuen Eukaristian aurreratu zuen. Bera da gure janari; Beraren bizitza eta hitza ditugu janari. Berarekin bat egiten gaitu guk ere Berak duen bizi bera izan dezagun: Aitagandik jaso duen bizia, betirako irauten duena (*Jn 6, 51-58*).

Azken egunean piztuko garela hitz eman digu Jesusek. Azken egun horren egia iritsi da dagoeneko Jesusen piztuerarekin, Bere bizitza presente da gugan eta fedean, itxaropenean eta maitasunean bizi dugu. Ez da betiko bizitza, baina bai haren aurrerapena eta hura biziko dugun promesaren ezaugarria, izango garena ikuskatzen dugu Jesusek egin digun eskaintza eskuzabalean.

Batasunaren sakramentua da Eukaristia. Janari dugun Kristorekin sakoneraino bat egitea. Eguneroko janaria hartzen dugunean, geureganatu egiten dugu janari horrek ematen diguna. Eukaristian, berriz, Kristo hartzean, guk egiten dugu bat Berarekin. Kristorekin bat egitean, Aitarekin bat egiten dugu, Jesusen misio bera agintzen digun Aitarekin... eta bere Bizitza gozatzen dugu.

Ogi beretik jaten dugunok, gorputz bera osatzen dugu, bizitza bera dugulako: Jesusen bizitza, Jainkoaren bizitza (*1 Ko 10, 16-17*). Familian sortzen da eta garatzen giza bizitza. Eukaristia ospatzeak eratu dezala Eliza Jainkoaren Familia moduan, bizi bera duten pertsonen elkarte, mahai berean janari bera jaten duten senideen elkarte.

Jainkoaren herriaren otoitza

Gizaki guztiak salbatzen dituen Pazkoa berrituko dugun mahai santua prestatu baino lehen, zuzen diezazkiogun Jainko Aitari gure otoitzak, entzungo gaituela uste osoz sinetsiz:

- Gotzainek eta apaizek bat egin dezatela Jaunarekin Eukaristian buru egiten dutenean, herri osoak ikus dezan horiengan, Bere izenean bildu dituen Kristoren irudi bizia.
- Kristau guztiok Eliza bakarraren batasunean Eukaristia ospatuko dugun eguna iritsi dadin, gizaki guztiak munduaren alde batetik besteraino Kristoren Gorputz-Odolen oparia eskain dezaten.
- Hilzorian dauden fededunek mundu hau bakean utz dezaten, eta Jaunaren promesak itxaronez eta Kristoren Gorputzak sendotuta zorianaren eta biziaren erreinura iritsi daitezten.
- Jaunak fedean eta maitasunean sendo gaitzan, espirituz eta egiaz gurtu dezagun Eukaristi Sakramentuan egiaz presente egiten den Kristo Jauna.

Jainko Jauna, Zeuk hitz emandakoekin laiala zara eta Zure herria maitasunez janaritzen duzu; entzun gure otoitzak eta piztu guran zugarako gogoa, zeu baitzara on guztien iturria; egizu, Kristoren Gorputz-Odol santuekin sendotuta aurrera egin dezagula zeruko mahairako bidean, han santu guztiakin batean bildu arte. Jesu Kristo gure Jaunaren bitartez.

Oparigaien gainekoa

Emaiozu onez zeure Elizari, Jauna, batasunaren eta bakearen dohaina horien adierazgarri mistikoa baita ekarri dizugun eskaintza hau. Jesu Kristo gure Jaunaren bitartez.

Eukaristiaren liturgiari oharpena

Egitera goazen diru-bilketa, Parrokiako Caritasen beharretan laguntzeko izango da. Horrela agerian jartzen dugu, Eukaristian Kristoren eskaintzarekin bat egitea, bizitzan behartsuei lagunduz gauzatzen dela.

Jaunartze-ondorengo otoitza

Emaguzu, Jauna, orain hartu ditugun
zure Gorputz eta Odol baliotsuez aurreratu diguzuna,
zure jainkotasunaren betiereko gozotasunaz ase gaitzen.
Errege bizi baitzara gizaldi eta gizaldietan.

Ekainaren 18an
URTEAN ZEHARREKO XI. IGANDEA

Agurra

Jauna zuekin.

Sarrerako oharpena

Senideok, Jaunak bere etxera eta bere mahaira bildu gaitu. Atsedeen egunak on egiten digu esker onez biltzeko, bere ontasuna eta maitasuna eskertuz. Bake-giroan eta otoitz lasaian Kristorekin bat eginez eta Igandea ospatuz.

Damu-otoitza

Senideok: Jainkoaren hitza entzun eta gure salbamenaren oroigarria behar bezala ospatzeko, presta ditzagun gogo-bihotzak, Jaunaren errukia eskatuz.

—Jesus Jauna, gure **ba**kea zarena. Erruki, Jauna.

—Jesus Jauna, guretzat **ogi** egin zinena. Kristo, erruki.

—Jesus Jauna, bizia **ema**ten diguzuna. Erruki, Jauna.

Erruki dakigula Jainko guztiz ahaltsua, eta, gure bekatuak barkaturik, eraman gaitzala betiko bizira.

Otoitza

Oi Jainko, Zugar itxaroten dutenen indarra,
entzun bihotz onez gure otoitza;
eta, Zu gabe, gizakiaren ahulezia ez baita ezertarako gai,
emaguzu beti zeure graziaren laguntza;
zure aginduak betez,
Zuretzat atsengingarri izan gaitezen gogoz eta egitez.

Zure Seme Jesu Kristo gure Jaunaren bitartez,
Zurekin eta Espiritu Santuarekin batean
Jainko eta Errege bizi baita gizaldi eta gizaldietan.

Hitzaren liturgiari oharpena

Jainkoak Ituna egiten du bere herriarekin eta pozik nahi gaitu, izan ere bere maitasunak mugari ez duelako. Jesusen guztienganako errukiak bere misioaren kide egin behar gaitu. Hitza entzuteak zabal dezala gure bihotza senide guztiengana.

Lehenengo irakurgaia (*Ir* 19, 2-6a)

Irteera liburutik

Egun haietan, israeldarrek Sinai basamortura iritsi eta han ipini zuten kanpalekua, mendiaren aurrez aurre.

Jainkoagana igo zen Moises. Jaunak menditik dei egin eta esan zion: «Hitz egin Jakob en ondorengoei, israeldarrei, eta adierazi hau: “Ikusi duzue zer egin die dan egiptoarrei, eta zuek nola eraman zaituztedan arrano-hegaletan eta Nigana ekarri. Orain, beraz, nire esana betetzen baduzue eta nire ituna gordetzen, zuek izango zaituztet herri guztien artean neure jabego berezi, nirea baita lur osoa; apaiz eta errege izango zaituztet eta Neuri sagaraturiko herri”».

Erantzun-salmoa (*Sal* 100 [99], 2. 3. 5)

Jau-na-ri kan - ta, o-na bai - ta, hain du haun-di -
a be - re be - ti - ko e-rru - ki - a.



- ∞. Lurtar guztiok, egin irrintzi **J**auhari,
zerbitza ezazue Jauna poz**aren** pozez,
sar zaitetze oihu alaiz haren **a**urrera. ∞.
- ∞. Jakizue Jauna dela **J**ainkoa,
hark egin gaitu, haren**ak** gara,
haren herri eta haren larreko **a**rtalde. ∞.
- ∞. «Ona bait**a** Jauna,
haren maitasuna bet**i**koa,
haren leialtasuna mendez mend**e**koa». ∞.

Bigarren irakurgaia (*Erm 5, 6-11*)

San Paulo Apostoluak Erromatarrei egindako gutunetik

Senideok: Oraindik bekatupean indargabe geundela, Kristo, Jainkoak erabakitako garaian, gaiztoen alde hil zen. Nekez onartuko luke norbaitek pertsona zuzen baten alde hiltzea; hala ere, pertsona on baten alde baliteke norbait hiltzeko prest egotea.

Baina Kristo, artean gu bekatari ginela, hil zen gure alde; honela erakusten du Jainkoak guri digun maitasuna.

Orain Jainkoak Kristoren odolaz zintzotzat hartu gaituelarik, zenbatez gehiago ez ote gaitu salbatuko zigorretik beraren bitartez!

Etsai ginelarik, Jainkoak berekin adiskidetu bagintuen bere Semearen heriotzari esker, zenbatez gehiago, behin adiskidetzuz gero, ez ote gaitu salbatuko haren biziari esker! Are gehiago, harrotu ere egiten gara Jainkoaz Jesu Kristo gure Jaunari esker, honen bitartez Jainkoarekin adiskidetzua iritsia baitugu dagoeneko.

Aleluia (*Mk 1, 15*)

A - le - lu - ia, a - le - lu - ia.



∇. Hurbil da Jainkoaren erregetza, dio Jaunak:
bihotz-berri zaitezte eta sinetsi Berri Ona. ∇.

Ebanjelioa (*Mt 9, 36–10, 8*)**Homiliarako argibideak**

1. Jainkoaren egun honetan, bere Semearengan eskaintzen digun dohaina jasotzeko elkartuta gaude. Jesus bere herriaren erdira dator kontsolatzeko, «apaizen erresuma bat, nazio santu bat» egiteko (*Ir 19, 6*). Hark gizakiei jakinarazten die «zeruetako erreinua gertu» dagoela (*Mt 10, 7*). Mezu hau fedez jasotzen dugu; Jainkoa nekatuta eta gogaituta dagoen herriaz jabetzen da. Gutako bakoitzari ere, Jaunak bere maitasun-presentziaren dohaina egiten digu, gure bizitza eraldatzen duen maitasunez.

2. «Uzta ugaria da, baina langileak gutxi» (*Mt 9, 37*), dio Jesusek ikasleak misiora bidali aurretik. Gure artean hasi duen Erreinua geureganatzera gonbidatzen gaitu Jaunak. Jesusi jarraitzera gonbidatzen gaitu, gure anai-arreben artean benetako lekuko izatera, haien artean Jainkoaren salbazioaren seinale izatera. Etsi-etsian dauden guztiengana, probaldian, bide-ertzean, ahaztuta, baztertuta dauden guztiengana joan eta Berri Ona iragartzera deituak gara: Jainkoak maite gaitu, eta Jainkoak maite gaituenaren ezaugarria Kristo guregatik hil zela da, oraindik bekatari ginenean» (*Erm 5, 8*).

Hamabiak bezala, Kristoren asmoan parte hartzera deituak gara. Dei horri erantzunez, gure kristau-bokazioaren eskakizunetan sakondu behar dugu, Jainkoak deitu digun modu berezian. Bera da gure itxaropena, gure benetako gozamina, Harengan aurkitzen dugu gure bizitzaren erabateko garapena.

3. «Eskatu, beraz, uzta jabeari, langileak bidal ditzan bere uztara» (Mt 9, 38). Gure hitz pertsonala eta elkartekoa eman behar dugu Elizaren egiteko nagusiaz arduratzeko. Horren bidez, Jainkoa gertuko sumatuko dugu, gero eta ikaslego izan gaitezen gizaki guztientzako bere adiskidetze eta salbazioaren zerbitzari. «Doan jaso duzue, eman doan» (Mt 10, 8). Kristoren gonbitak Jainkoaren izate eta jarduteko modua doakotasuna dela pentsarazten digu: Israel aukeratu zuen doan bere herria izan zedin; dohainik eskaini zion bere Seme bakarra munduaz oroitzeko; dohainik aukeratu zituen Hamabiak, beren izenez deituz, zeruko erreinuko apostolu izateko. Maitasun-misterio horri buruz galdetuta, Mariak bezala, gure bizitza osoarekin erantzuten dugu: doan jaso dugu, doan ematen dugu.

Jainkoaren herriaren otoitza

Senideok: egiogun otoitz gure begiekin ikusten ez duguna ere ezagutzen duen Jainkoari, Berak badaki-eta gizakion beharrak zein diren:

- Egin dezagun otoitz Elizaren alde: Jainkoak, gure Jaunak, sendo dezan, zatiketa guztiak urrun ditzan eta munduko kristau guztien otoitzak entzun ditzan.
- Egin dezagun otoitz gure herriko eta mundu guztiko agintarien alde: Jainkoak jakinduria eta indarra eman diezaien, bere ardurapean duten herria bakez eta justiziaz goberna dezaten.

—Egin dezagun otoitz etxetik urrun daudenen alde: Jaunak etxera pozik itzuli eta familiarekin elkartzeko dohaina eta zoriona eman diezaien.

—Egin dezagun otoitz hemen bilduak gaudenon alde eta ospakizunean buru egiten duenaren alde ere. Jaunak gure otoitza entzun dezan, eta gure eskariak Bere gogoko izan daitezzen beti.

Jainko Jauna, apaiz-herri aukeratu gaituzu eta Zure erreinuaren ezaugarri izatea nahi izan duzu; entzun gure otoitzak eta emaguzu Zurekin bat eginda bizitzea, bai gorapenean eta baita senideen zerbitzuan ere, gizaki guztien aurrean Ebanjelioaren hots egile eta testigu izan gaitezen. Jesu Kristo gure Jaunaren bitartez.

Oparigaien gainekoa

Oi Jainko, orain eskaintzen dizkizugun dohainetan bizitza honetarako janaria eta bizi berriaren sakramentua ematen dizkiozu gizadiari bere izaera bikotzerako; egizu, gure gorputz-arimak ez daitezela inoiz ere laguntza horiek gabe gerta. Jesu Kristo gure Jaunaren bitartez.

Jaunartze-ondorengo otoitza

Jauna, hartu dugun sakramentuak fededunok Zurekin bat garela adierazten duen bezala, egin dezala Elizaren batasuna Jesu Kristo gure Jaunaren bitartez.

Ekainaren 25ean
URTEAN ZEHARREKO XII. IGANDEA

Agurra

Jauna zuekin.

Sarrerako oharpena

Jauna gure artean da egiaz. Bere bizitza eta hitza deigarri dira guretzat. Kristori jarraitzeko gogoz, Haren Ebanjelioa onartzeko asmoz eta Ebanjelio horretan seme-alaben askatasun osoa aurkitzeko pozez bildu gara: askatzaile gerta dakigula Berri Ona.

Damu-otoitza

Senideok: Jainkoaren hitza entzun eta gure salbamenaren oroigarria behar bezala ospatzeko, presta ditzagun gogo-bihotzak, Jaunaren errukia eskatuz.

- Jesus Jauna, Zu zara guretzat Aitarenganako bidea: erruki, Jauna.
- Jesus Jauna, Zu zara gure ilunpeak argitzen **dituen** egia: Kristo, erruki.
- Jesus Jauna, Zu zara mundua berri**tzen** duen bizia: Erruki, Jauna.

Erruki dakigula Jainko guztiz ahaltsua, eta, gure bekatuak barkaturik, eraman gaitzala betiko bizira.

Otoitza

Izan dezagula beti, Jauna,
zure izenarekiko begirunea eta maitasuna,
ez baitituzu zeure eskutik behin ere uzten
zeure maitasunean sendo jarri dituzunak.

Zure Seme Jesu Kristo gure Jaunaren bitartez,
Zurekin eta Espiritu Santuarekin batean
Jainko eta Errege bizi baita gizaldi eta gizaldietan.

Hitzaren liturgiari oharpena

Norberak sinesten duenaren testigantzan leial irautea, pertsonalitate handiko biziera da. Eta zailtasun eta oztopo guztiez gain Berri onaren pozetan irautea are ederragoa. Ebanjelioak testigantzarako gonbidapena luzatzen digu: gertatuak gertatu Jesus gurekin dugu.

Lehenengo irakurgaia (*Jr 20, 10-13*)

Jeremias Profetaren liburutik

Honela mintzo zen Jeremias: «Jendearen mehatxuak entzuten ditut, beldur-ikara nonahi: “Salatu, sala dezagun”. Adiskideak berak ere begira ditut, nik noiz huts egingo: “Ea engainatzen dugun, diote; orduan menderatuko dugu eta mendekua hartuko”.

Baina neurekin dut Jauna, gudari indartsu; eroriko dira nire etsaiak, ezin izango naute garaitu; haien asmoek porrot egingo dute, haien lotsa sekulakoa izango da, ahaztezina betiko. Jaun ahalguztiduna, zuzen aztertzen duzuna, gizakiaren buru-bihotzak ikusten dituzuna, zure esku utzi dut neure auzia: ikusiko ahal dut zure mendekua etsaien bizkar!

Kanta Jaunari, goretsazue Jauna, hark askatu baitu gaiztoen eskutik behartsuaren bizia».

Erantzun-salmoa (*Sal* 69 [68], 8-10. 14 eta 17. 33-35)

Ez e- gon, Jau - na, ni- gan- dik u - rrun; zu- re- a nau-
 zu, za - toz - kit la - gun.

- ∞. Zuregatik jasan ditut irainak, '
 Zuregatik lotsaz gorritua dut aurpegia.
 Arrotz gertatu naiz neure senideentzat, '
 ezezagun neure amaren seme-alabentzat.
 Zure tenpluaren maiteminak erretzen nau,
 eta gainera datozkit Zuri egindako irainak. R̄.
- ∞. Baina nik Zuri degizut otoitz; '
 mesede-garaia duzu, Jauna.
 Erantzun, ene Jainko, zeure maitasun handiaz, '
 zeure salbamen leialaz.
 Erantzun, Jauna, samurra baita zure maittasuna,
 bihurtu nigana begiak zeure erruki handidiaz. R̄.
- ∞. Ikus ezazue, apalok, eta poztu, '
 izan bihotz, Jainkoaren bila zabiltzatenok.
 Izan ere, entzuten die Jaunak behartsuei, '
 ez ditu gutxiesten berari atxikiak.
 Gorets bezate zeru-lurrek,
 itsasoak eta bertan bizi diren guztiek. R̄.

Bigarren irakurgaia (*Erm 5, 12,-15*)

San Paulo Apostoluak Erromatarrei egindako gutunetik

Senideok: Gizon baten bidez sartu zen bekatua munduan, eta bekatuaren bidez heriotza; horrela, heriotza gizaki guztiengana zabaldu zen, guztiek egin zutelako bekatu. Egia da legea baino lehen bazela bekatua munduan; baina bekatua ez zaio inori ezartzen, legerik ez badago. Hala ere, Adamengandik Moisesenganaino nagusi izan zen heriotza gizakien gain, baita Adamen hutsegitearen antzeko bekatuak egin ez zutenen gain ere. Adam etortzekoa zenaren irudi da.

Baina Jainkoaren dohainarekin ez da bekatuarekin bezala gertatzen. Izan ere, gizon bakar baten bekatuaz denak hil badira ere, askoz ugariago zabaldu da denentzat Jainkoaren grazia eta dohaina, beste gizon bakar bati esker, Jesu Kristori esker, alegia.

Aleluia (*1 Sm 3, 9; ik. Jn 6, 68c*)

℣. Egiaren Espirituak aitormen egingo du nire alde, dio Jaunak, eta zuek ere egingo duzue aitormen. ℟.

Ebanjelioa (*Mt 10, 26-33*)**Homiliarako argibideak**

Egiak beldurra kentzen digunean

«Ez izan beldurrik». Hori esanez bidali zituen Jesusek apostoluak ebanjelioa iragartzera, munduko bazter guztietan jende guztiaren aurrean testigu izatera.

Eta egiteko hori ematean, hiru aldiz errepikatzen die beldurrik ez izateko.

Eta, zergatik izan behar zuten ba beldur? Ebanjelioa hots egitea eginkizun arriskutsua ote da ba? Izan ere, bai. Garai artan eta orain ere bai, egunotan, gizarterik aurreratuen eta askeetan ere bai, erlijio askatasuna eta adierazpen askatasuna aldarrikatzen direnean ere bai. Egiazko profetentzat ez da sekula adierazpen askatasun osorik egon.

Jesus atxilotua izan zen, epaitua eta heriotzara zigortua baita gurutzean hila ere... eta hori guztia behartsuei Jainkoaren erreinuaren ebanjelioa iragartzeagatik. Berdintsu gertatu zitzaien lehengo profetei ere, Jeremiasi adibidez, zapaldua eta pertsegitua izan baitzen tenpluaren eta tenpluko nagusien aurka mintzatzeagatik. Eta honela gertatu zen apostoluekin ere. Horregatik esan zien Jesusek beldurrik ez izateko.

Ebanjelioa hitz publikoa da. Ez jendaurrean esaten delako eta mundu osoari zuzendua dagoelako bakarrik, bizitza publikoari eragiten diolako ere bai. Berri ona ez da berririk onena gertatzen egiaren etsaientzat, bere burua jainkotzen dutenentzat, zapaltzaileentzat, ondasunetan aberastu direnentzat, guztien ongia bilatu beharrean bere buruarentzat bakarrik jarduten direnentzat.

Ebanjelioa ez da hitz ilun eta urrutikoa aingeruez ari dena, baizik eta ezpata bezala gizakien bizitzan eta jardunean zorrotz sartzen da. Ez da egia teorikoa, ulertu bai baina eragiten ez duena; egia praktikoa da, eraginkorra, bere alde edo aurka jarri erabakitzea eskatzen duena, Jainkoarekin dugun harremana aldatzen duena, Aita deitzen erakusten diguna eta gizakiak senidetzat hartzera garamatzana.

Ebanjelioak elkarrizketa bideratzen du, baina borroka ere bai inoiz, gorrotoaren eta gezurraren aurka egitera eragiten baikaitu, ilunpeen aurka ari den argia bezala.

Guztiok ebanjelioaren zerbitzura deituak gara: bataiatuok Jesusen egitekoan parte hartzen dugu, horretara konprometituak gaude, Jainkoaren asmoa betez eta bere Erreinua munduan gauzatzen saiatuz. Badakigu, ordea, Jainkoa gurekin dugula babesten, daramagun Ebanjelioa bera dugula indar Jainkoarengan sinesten dugunok.

Izan ere, ebanjelioarekin kontrajartzen den gezurra ez dago gure aurrean edo gure inguruan bakarrik, gure barruan ere bai sarritan. Eta bota egin behar dugu gugandik, Jainkoaren Hitzaren indarrez, ebanjelioa fedez onartuz. Jakinik, ezin diegula besteei iragarri geuk egiten ez duguna. Gezurrak menperatzen gaitu inoiz, ebanjelioa aitortzeko eta bizitzeko beldurra gudan sartuz, Jainkoaren eta gizakien aurrean testigu izatea galeraziz. Gezurraren aurka borroka egin behar da: egiak egiten gaitu aske, ebanjelioa da egia askatzailea. Ezin dugu beraz indarra, inposaketa eta gainetik egotea erabili... Testigantza eman behar dugu, eta egiari utzi bere indarrez errotu dadin eta fruitu eman dezan.

Jainkoaren herriaren otoitza

Eska diezaiogun Jaunari, senideok, entzun ditzala konfiantzaz eta pozez egiten dizkiogun otoitzak:

- Eska diezaiogun Kristo Jaunari bere bizitza Jaunaren zerbitzura sagaratu duten Eliz zerbitzarien alde eta egiazko Jainkoa gurtzen duten herri guztien alde.
- Eska diezaiogun mundua jakinduriaz gobernatzen duen Jainkoari gu guztion alde, mundua eta natura bereziki arretaz eta esker onez zaindu dezagun.

- Eska diezaiogun Jainko errukitsuari giza ahultasunaren, gorrotoaren eta enbidiaren sareetan lotuta bizi diren guztien alde.
- Eska diezaiogun Jaunari batak bestearen alde, jar dezagun gure bizitza Beraren eskuetan eta egiogun otoitz uste onez gauza guztien Egile eta Nagusi denari.

Jesu Kristo Jauna, gure ahultasunean konfiantza izan duzu Zure hitzaren iragarle izateko; entzun gure otoitzak eta eutsiguzu Espirituaren indarrez, gure fedez inoiz lotsa ez gaitezen baizik eta ausardiaz aitor dezagun gizakien aurrean, azken etorrerako egunean ere gure aldeko izan zaitezten zeruko Aitaren aurrean. Errege bizi baitzara gizaldi eta gizaldietan.

Oparigaien gainekoa

Onartu, Jauna, eskaintzen ari garen
bake- eta gorespen-sakrifizio hau;
garbitu eta berritu gaitzala
gure bizitza osoa Zuretzat opari atsegingarri izan dadin.
Jesu Kristo gure Jaunaren bitartez.

Jaunartze-ondorengo otoitza

Kristoren Gorputz santuaz eta Odol baliotsuaz
berritu gaituzu, Jauna;
egizu misterio santu honetan parte hartzeak
ekar diezagula egiazko erospena.
Jesu Kristo gure Jaunaren bitartez.

